

歸綏識畧卷五

崞縣張

曾小表初輯

地部

山川

陰山見史記趙武靈王自代并陰山秦始皇逐匈奴
 並河以東屬之陰山築亭障為河山塞括地志曰陰
 山北戎地在朔州北塞外東西千餘里漢武帝克匈
 奴置陰山縣皆在此山山海經有二陰山俱在西山
 而南流注於蕃澤其中多文貝又西次四經之首曰
 陰山山上多穀無石其草多芣蕃陰水出焉西流注
 於洛俱一統志即今之大青山也在歸化城北二十
 里東接察哈尔境迤北而西直抵鄂尔多斯以黃河
 為畧北有數口皆通大漠高數千仞廣三百餘里袤
 百餘里內產松柏林木遠近望之嵐光翠靄一帶青
 葱如畫屏森列府志謂考漢唐諸史五原豐勝無大
 青山之名惟漢書五原郡西安陽北有陰山徐廣曰
 陰山在河南陽山在河北遼史豐州振武縣即漢定
 襄郡盛樂縣背負陰山前帶黃河元魏嘗都此明一
 統志及山西通志古豐州境有黑山與雲內州夾山

東西相連疑大青山即古陰山黑山也府志元延祐

間脩道碑以大青山為祁連山北人呼天為祁連金

時邊外有天山縣因名大青山為祁連山考祁連山

在陝甘涼州以天山為名距此甚遠惟括地志有連

山史記正義曰地理志朔方臨戎縣北有連山或亦

此山之分支至輯要謂大青山在城西南二百五里

蒙古名庫魯合邵訪之居民無一知者所云翁公山

在城北三十五里西至河套之北起烏喇特西境東

至歸化城東北層巒峻嶺綿亘五百餘里上有元時

建甸城廢址其即此山無疑曰翁公者通山後瓦剌

等處有吳公壩口或即其轉音之訛顧氏方輿紀要

大同府西北塞外有山曰青山唐貞觀十五年李世

勣擊薛延陀逾白道追及之於青山即此明嘉靖中

中國叛人逃出邊者升板築牆蓋屋以居乃呼為板

升有衆十餘萬南至邊牆北至青山東至威甯海西

至黃河岸南北四百里東西千餘里一望平川無山

陂谿澗之險耕種市廛花柳蔬園與中國無異各部

長分統之紀要語曰愚按板升蒙古語呼

屋也或曰城也一作拜姓其音相近無定

字必以升板築墻
解之則鑿矣

所謂青山亦即此大青山也明史

嘉靖三十五年俺答老弱避暑大青山外此大青二字入史傳之始當為我

朝龍興之讖云

曾按輯要在城西南南字若作北字則典後附諸說可通或劄劄之訛典

附通志大青山祁連山陰山陽等地通辨

歸化城在遼金元豐州之域其西有陰山陽山大青山北通瀚海南臨黃河秦使蒙恬北擊胡渡河取高闕據陽山北假後漢五原郡西安陽北有陰山武帝克匈奴置陰山縣徐廣謂陰山在河南陽

山在河北水經注鍾山即陰山又曰陽山即陰山元延祐脩道碑又謂大青山即天山即祁連山明一統志大青山即陰山是諸山名雖異而實同也按石磧山之西為陰山山東南為東受降城陰山之西為陽山更西為大青山山東南為中受降城西南為西受降城城西越長寧河阿保之南即賀蘭山也至甘州為漢張掖郡窮石之東為焉支山肅州為漢酒泉郡高臺之南為祁連山此皆在嘉峪以東至於伊州之北為天山其西為柳陳城更

西為高昌即明火州為漢車師唐交河蒲類兩縣地是天山與祁連已東西判然矣金時以邊外稱天為祁連置淨州天山縣遂名大青為祁連而元亦因之宜覈水經注山在中國之極北故名陰山水北曰陽山在河水之北故亦謂之陽山以此正徐廣陰山在河南一語之誤誠是矣然河自明季三部落之西北轉逕大青山之陰其南有馬陰山山以東即周朔方漢朔方郡及明河套故地水經所云河水又南逕馬陰山西是也徐廣之所謂陰

山在河南庸或指此山乎抑宜覈

附松龕中丞陰山考畧

由兩漢邊郡考畧內摘鈔

一統志陰山俗名大青山西自河套北烏拉特西境東至歸化城東西綿亘五百餘里蒙古土名隨地而異皆古所謂陰山也其實陰山橫障漠北南起賀蘭山蜿蜒而北為古之狼居胥山又迤邐起伏而東北直至遼東廣寧邊外皆岡阜接連峯巒疊起中外土名以數十百計自套北至遼蓋三四千里漢書匈奴傳侯應言陰山千餘里蓋約畧言

爾又一統志言陽山在陰山西河套正北與陰山
接連以東西異名耳在烏拉特西北二百四十里
陽山之前即秦之北假秦時蒙恬度河據陽山取
其地名為北假北假者以地假與貧民使墾種也
其西即高闕塞予按後漢書郡國志注徐廣曰陰
山在河南陽山在河北其曰陽山在河北是也至
云陰山在河南殊不可解河南即今河套套內之
山據一統志有二十餘然大勢多平土其山皆部
婁岡阜絕無高大之名山陰山為朔漠障蔽橫亘

三四千里即所謂內興安嶺套內一片土將何地
以容之考前漢西河郡有陰山縣其地大約在套
內徐廣或本此以立說然西河郡之陰山自當是
套內同名之小山豈可以區區者當朔漠數千里
之陰山耶

緣胡山見漢書地理志雲中郡楨陵注云在楨陵西
北十三州志楨陵北去雲中城一百二十里水經河
水流楨陵西北當即今托克托城地緣胡山當即今
胡塞口也漢書注狐一作胡

天德山見漢書李陵自居延行至天德山唐宋置天德軍遼史太祖平黨項遂破天德軍元史河源錄過達之地古天德軍蓋軍以山名在今烏喇特境金置天山縣北人呼天為祁連以致元脩道碑有祁連山之稱皆即此山與涼州之山名同而實異德字不可

省也

達二字元人自稱至明始作達鞞又作韃鞞

黑山見魏書神麄二年車駕東至黑山數軍實通志謂即殺虎山又謂在古豐州境與雲內州夾山相連府志有大青山終即古陰山黑山之說蓋亦古陰山

之隨地而異名者也北人青黑二字往往通用如青冢土黑聞者以冢草獨青釋之陰山迤西望之黝然而黑因先有黑山之名而後有青山又名大青山其寔仍一山耳

和尕山見魏書魏主燾始光三年自雲中西巡至五原既而田於陰山東至和尕山山在陰山之東似即今紅螺谷地

薄山見魏書天興二年襲高車還至牛川及薄山刻石紀功徒其降民於漠南高車在漠北襲之而還至

牛川薄山似即今之黑牛溝左右山也

柞山亦云柞嶺魏始光初命長孫翰等伐柔然自將屯柞山是年破夏統萬引兵還至柞嶺神麌二年燾西巡至於柞山先是晉元熙元年魏主嗣泰常四年田於犢渚李延壽曰犢渚在柞山之西方輿紀要山在大同塞外四百餘里詩小雅疏柞木全白而無赤心性堅理直終今之白杉榭也烏喇特境內有山產杉樹極多今即名烏喇山亦曰西山當即其地芻水渚數處不知孰為犢渚以田獵言惟五當溝似之

石子嶺紀要在盛樂西南晉書苻秦伐代戰石子嶺新唐書自夏州北渡烏水百二十里又百餘里玉石子嶺當即今喇麻灣山嘴又陵石或曰邑名以其有山谿之險因置邑於此北史東如陵石在盛樂東東木根山在黃河東晉太寧二年代王賀偽以諸部未服築城於東木根山而徙居之志曰五原有木根夾山見遼史天祚避女直姦夾山通志謂在朔州北三百四十里與黑山東西相連或謂即紅山摩天嶺諸山也按通志之說似即今吳公壩口

天祚奔此欲投往漠北耳

七寶山下有古城相傳即漢五原郡城或曰金屯兵城也輯要有寶山在城東八十里

官山下有九十九泉流為黑河見府志元史太宗嘗避暑於此張運青鵬翻奉使日記九十九泉池有心

肺二山相連

牟那山通志謂在朔州北三百里隋大同城舊墟在馬山近有耳嘴城有秦長城當即甸城脩路地

狼山城南一百二十里蒙古名綽農圖哈喇石碌山城西四十里蒙古名哈爾金和邵出石碌方輿紀要在故平地

縣東太白山城西二百五里蒙古名插漢白雲山城西

二百六十五里蒙古名插漢俄博牛心山城西北一百十里蒙古名顏朱爾克蟠羊山城東北七十里蒙

古名衣馬圖魏書太祖紀天賜四年北巡至參合陂

東過蟠羊山即此六山俱見輯要典謂大青山在城西南二百五里蒙古名庫合邵者同輯要成於乾隆四十五年距今僅八十年而山川名目已不可考文獻之徵難矣哉

九峯山在城東南一百二十里九龍灣東西石山上有九峯故名今為和林格爾地

紅山在城南百五十里紅城南東接榆樹梁西抵刺

麻灣有紅山口見府志又東北七十里有大紅山口
三十里有小紅山口今名紅沙口

半箇山黑青山照壁山俱在平魯邊外見府志清水河畧
托里岡在城東南五里

繡衙壩在城東南二百餘里高五里圍十數里

榆樹梁在城東南二百餘里府境邊外高三里周圍

十里通平魯縣邊外大小榆樹灣山甚險峻多榆樹

未知即古榆林否古榆林與陝西榆林府異

白道梁在城東南二百三十里府境邊外高三里周

圍十里

摩天嶺在城南一百五十里黑城東高五里周圍二

十里

黑勒庫谷在城西七十里谷內盡松柏樹

五達谷在城西二百五十里

紅螺谷城東北二十五里蒙古名烏蘭察布輯要作五藍義

拍音近無定字即四子部落等會盟所也各內產松柏樹

喀喇克沁谷亦蒙古名城東北四十五里即今演放

礮位之喀喇沁溝也谷產材木與紅螺谷同

榆溝在城東北九十里蒙古亦名烏里雅蘇台典定

副將軍城
名同地異

黃河通志在城西南一百六十里自烏喇特畧東南
流入境又折而南黑河水自東來注之又東南經湖
灘河朔紫河水自東來注之又折而西南流入偏關
縣畧府志在城西北二百七十里自西北山嘴折而
東南流至脫脫城西折而東南三十里至刺麻灣山
嘴復折而西南至甯武偏頭老牛灣入閩河口又考
元史河源錄曰河東北流過達、地八百餘里過豐

州西受降城折而正東流過達達地古天德軍凡七
百餘里折而正南過大同路雲內州東勝州與黑河
合方輿紀要則曰河在廢東勝州西八里自榆林北
塞流經此乃折而南經朔州西境入河曲保德州界
各書詳畧不同道里亦多參錯今查河上流自甘肅
來由南而北至高關塞始折而東經烏喇特等旗以
南河套以北曲折千餘里入薩拉齊境折而東南百
餘里至二道河入托克托城境黑河流注迤南為湖
灘河朔至刺麻灣入清水河境紫河及各溝水流注

至老牛灣出境為偏關縣界自東南流至此約三百餘里府志所謂至托托城西折而東南至刺麻灣折而西南者誤黃河九曲計其大者而言小有轉折隨曲隨直不能計也元史河源錄前達達地即今阿拉善在河套西後達達地即今烏喇特旗在河套北古天德軍亦在其地大同路雲內州即今薩拉齊地東勝州即今薩拉齊連托克托城地河道明而古今疆域約畧可指無惑乎談方輿者必本乎水經矣方輿紀要所謂自榆林北塞流入仍是漢唐以來關中建都通套語更不足據顧氏自言於邊外方輿未能如內地之言之鑿蓋足跡所未及故耳

附水經二十節

河水又屈而東流為北河東逕高關南始入今烏喇特界
 河水自臨河縣東逕陽山南又南逕馬陰山西
 河水又東南逕朔方縣故城東北城在套內
 河水自朔方東轉逕渠搜縣故城北城在套內
 河水又東逕成宜縣故城南
 河水又東逕原亭城南

河水又東逕宜梁縣之故城南

河水又東逕稠宋本陽城南

又東過臨沃縣南

河水又東枝津出焉河水又東流石門水南注之

河水又東逕廂陽縣故城南

河水又東逕塞泉城南而東注又東過雲中楨陵

縣南又東過沙南縣北從縣東屈南過沙陵縣西

河水屈而流白渠水注之上節入今薩拉齊界此

河水南入楨陵縣西北

又南過赤城東又南過定襄桐過縣西

河水於二縣之間有君子之名

河水又東南左合一水入今清

河水又南樹頽水注之紫河合流各

河水又南太羅水注之以上二十節於邊外數郡

蔡氏補正之奔不傳於世今之郡邑雖即元氏

舊疆而名辨既殊波流豈復一轍或名在而邑徙

黑河在城南二十里蒙古名伊克土爾根輯要謂即

古白渠荒干水也源出鑲藍旗察哈爾東北七十里

海拉蘇台坡名喀喇烏素俱蒙古語漢書地理志定

襄郡武進縣注白渠水出塞外西至沙陵入河武舉

縣注荒干水出塞外西至沙陵入河當即黑河之正

名後世因水色純黑與黃河水別且出北方故俗名

黑河耳元史海都列營帳於黑河上跨河為梁以便

往來一統志黑河古豐州界源出官山西流入雲內

州界至東勝州入黃河府志發源大青山東官山九

十九泉經城南二十里為大黑河至脫々城西南伏

流入黃河又小黑河在城南十里蒙古名小土尔根

河兼漢語西流四十里至洪津入大黑河府志謂源

出左右山峪以今考之則自城東北討速號溝發源

疑小黑河為白渠之俗名大黑河為荒干之俗名也

又黑勒庫河出黑勒庫谷亦西南流入黑河復入黃

河明史嘉靖中總兵劉漢部分參將麻祿等出勒經

二黑河一灰河灰河在朔州入桑乾河不在邊外

附水經河水屈而流白渠水注之注

水出塞外西逕定襄武進縣故城北西部都尉治

王莽更曰伐蠻世祖建武中封趙憲為侯國也白

渠水西北逕成樂北郡國志曰成樂故屬定襄也

魏土地記曰雲中城東八十里有成樂城今雲中郡治一名石靈城也白渠水又西逕魏雲中宮南魏土地記曰雲中宮在雲中故城東四十里白渠水又西南逕雲中故城南故趙地虞氏記云趙侯自五原河曲築長城東至陰山又於河西造大城一箱崩不就乃改卜陰山河曲而禱焉晝見羣鵠遊於雲中裴回經日見大光在其下武侯曰此為我乎乃即於其處築城今雲中城是也秦始皇十三年立雲中郡縣曰遠服矣白渠水又西北逕沙陵縣故城南王莽之希恩縣也其水西注沙陵湖又有芒于水出塞外南逕鍾山山即陰山故郎中侯應言於漢曰陰山東西千餘里單于之苑囿也自孝武出師攘之於漠北匈奴失陰山過之未嘗不哭謂此山也其水西南逕武皋縣王莽之永武也又南逕原陽縣故城西又西南與武泉水合其水東出武泉縣之故城西南縣即王莽之所謂順泉者也水南流又西屈逕北興縣故城南按地理志曰五原有南興縣王莽之南利也故此加北舊

中部都尉治十三州志曰廣陵有輿故此加北疑
 太踈遠也其水又西南入芒于水西南逕白道南
 谷口有長城在右側帶長城背山面澤謂之白道
 南谷口有城自城北出有高阪謂之白道嶺沿路
 惟土穴出泉挹之不窮余每讀琴操見琴慎相和
 雅歌錄云飲馬長城窟及其板陟斯途遠懷古事
 始知信矣非虛言也顧瞻左右山楹之上有垣若
 頽基焉沿溪亘嶺東西無極疑趙武靈王之所築
 也芒于水又南西逕雲中城北白道中谿水注之

水發源武川北塞中其水南流逕武川鎮城以景
 明中築以禦北狄矣其水西南流歷谷逕魏帝行
 宮東世謂之阿計頭殿宮城在白道嶺北阜上其
 城員角而不方四門列觀城內唯臺殿而已其水
 又西南歷中谿出山西南流於雲中城北於雲中
 城北南注芒于水于又西塞水出懷朔鎮東北芒
 中南流逕廣德殿西山下余以太和十八年從高
 祖北巡屈於陰山之講武臺之東有高祖講武
 碑之文是中書郎高聰之詞也自臺西出南上山

山岳樹木唯童阜耳即廣德殿所在也其殿四柱
 兩厦堂宇綺拱圖畫奇禽異獸之象殿之西北便
 得焜煌堂雕楹鏤角取狀古之温室也其時帝幸
 龍荒遊鸞朔北南秦王仇池楊難當捨蕃委誠重
 譯拜闕陞見之所也故殿以廣德為名魏太平真
 君三年刻石樹碑勒宣時事碑頌云肅清帝道振
 攝四荒有蠻有戎自彼氐羗無思不服重譯稽顙
 恂々南秦斂々推亡峨々廣德奕々焜煌侍中司
 徒東郡公崔浩之詞也碑陰題宣成公李孝伯尚

書靈遐等從臣姓名若新鏤焉其水歷谷南出陰

山西南入芒于水芒于水又西南注沙陵湖湖水

西南入於河芒于漢書注作荒干或作芒干或作

注內應採入山川古蹟者甚夥今其蹟湮沒無考因錄全注以備稽覈

紫河輯要謂即古中陵樹額二水蒙古名烏蘭木倫

源出察哈爾西南境內西流至殺虎口北合邊內北

來之兔毛河又西至烏闌巴爾哈孫城西入黃河隋

大業三年發丁男十萬築長城西距榆林東至紫河

二旬而畢唐貞觀十四年遣突厥阿史那思摩建牙

於此亦曰紫乾河天寶初朔方節度使王忠嗣北討
奚恕皆戰於紫乾河又隋志定襄郡大利縣有陰山
紫河杜佑曰勝州榆林縣有金河紫河自馬邑郡善
無縣流入境合金河又南流入於大河

附水經河水又南樹頽水注之注

水出東山西南流右合中陵川水水出中陵縣東
南山下北俗謂之大浴山其水亦取名焉東北流
逕中陵縣故城東北俗謂之北右突城王莽之遮
害也十三州志曰善無縣南七十五里有中陵縣

世祖建武二十五年置其水又西北右合一水水
出東山北俗謂之貸散山水又受名焉其水自西
北流注於中陵水又西北流逕善無縣故城西王
莽之陰館也十三州志曰舊定襄郡治地理志曰
雁門郡治其水又西北流又會一水水出東山下
北俗謂之吐文水山又取名焉北流逕鉏亭南西
流土壁亭南西出峽左入中陵水、又北分為二
水一水東北流謂之流水又東逕沃陽縣故城南
北俗謂之可不塋城王莽之敬陽也又東北逕沃

陽城東又東合可不塗水出東南六十里山下西北流注沃水又會東逕參合縣南魏因參合陁以即名也北俗謂之倉鶴陁道出其中亦謂之參合口徑在縣之西北即燕書所謂太子寶自河還師參合三軍奔潰即是處也魏立縣以隸涼城郡也西去沃陽縣故城二十里縣北十里有都尉城地理志曰沃陽縣西部都尉治者也北俗謂之阿養城其水又東合一水水出縣東南六十里山下北俗謂之災豆渾水西北流注於沃水又東北流注鹽池地里志曰鹽澤在東北者也今鹽池西南去沃陽故城六十五里池水澱渟淵而不流東西三十里南北二十里池北十里即涼城郡注池西有蕭城俗謂之涼城也郡取名焉地理志曰澤有長丞此城即長丞所治也城西三里有小阜：下有泉東南流注池北俗謂之大谷此佳水亦受目焉中陵川水自枝津西北流右合一水於連嶺北出沃陽縣東北山下北俗名之烏伏真山水曰誥升袁河西南流逕沃陽縣左合中陵川亂流西南與一水合北俗謂之樹頽水：出東山下西南流右

合誥升表水亂流西南注分為二水左水枝分南
出北俗謂之太羅河右水西逕故城南北俗名之

昆新城其水自城西南流注於河注內山川古蹟其無考与前注

同仍將全注附錄之

金河上承紫河泥紫金色故名隋大業三年北巡發

榆林歷雲中泝金河幸突厥啓民帳即此唐置金河

縣一統志金河在古雲內州東南百五十里府志金

河泊在東勝州西流入天瑞泊入黃河在清水河界

清水河疑即古甯邊河也源出平魯縣西北諸山經

大水七整二口流出口外合邊外諸水至岔河口入

黃河今以為烏闌巴尔哈孫一帶置廳總名

頭道河二道河三道河俱在城東南即口內兔毛河

水西流經紅城亦名紅河西南至岔河口入黃河

黃水河在城北百餘里蒙古名西拉木倫源出包古

尔泉東北流入喀尔喀右翼界圖入黃河者誤○又金河亦名亥水河

諾真水在古雲中城西北見唐志貞觀十五年李世

勣追薛延陀衆於青山又敗之於諾真水疑即今黑勒庫河

山黛湖輯要謂即沙陵湖古沙陵縣地疑即今薩拉齊沙海子

叶
大海一作岱海在城東南或謂即蘇子卿海上看羊地也今有招寺在其地

七星湖在城西南一百七十里黃河東岸有七水眼旋轉望之如星今薩拉齊托克托城界有村以七星湖名

豐州灘城西一百二十里蒙古名伊克蘇爾哲源出蘇爾哲谷東南流入黑河見輯要或以為歸綏一帶總名

居延川一名居延澤漢書蘇武嘗困於此通志在雲內州境又云居延川在陝甘地距此頗遠邵陽魏氏聖武記曰居延山蒙古語為崑都倫此間乾隆初未分五廳以前有東路崑都倫協理通判在和林格爾境內或別一居延地也又記謂大青山蒙古語名漢喀喇陰山名葛札爾黑山名喀喇俄博圖附識以備考

按禹貢首奠山川山川融結地氣之厚薄因之古者建立國邑必相山川形勢向背以驗地氣之聚散非徒以供游眺快登臨也我晉國表裏

山河即閩外一隅亦復層巒疊嶂河流環繞惟
雁門以北山險峻而弗秀水渾濁而弗清行道
者輒生南北之感且俗諺有是山無頭是水倒
流諸語至殺虎口外則別一景象矣然通都大
邑山川易於得名僻遠之區游蹤罕及元遺山
登山岳詩云東州死愛華不注向在陋邦何足
數敬亭不著謝宣城岢岸何緣比天姥洪震老
人咏之安東泉山詩云通都大邑人爭馳一泉
一石小亦奇雲深路絕無人處縱有佳山誰得
知二詩意絕相類山川顯晦所在皆然况窮邊
極塞耶五原豐勝諸州山川見諸史策者大率
因軍行所至紀載路塗無高人逸士棲隱之所
無景物名勝之蹟崑崙瀚海北之沙漠以外前
代度漠之軍所至如狼居胥山冥顏山浚稽山
涿邪山燕然山皆距代郡定襄雲中朔方一二
千里今未敢確指為何山我

朝臣服漠南北蒙古凡阿尔泰山杭愛山以及興安
內外嶺畫繇版圖一統志於北幹支派言之至

詳且盡惟以陰山為天山一支魏氏記已辨其
誤蓋魏氏謂天山之脈盡於玉閭賀蘭陰山乃
和闐中幹之支非天山之支考諸各書問之行
人無不吻合陰山在歸化城北為漠南口北第
一山即今之大青山毫無疑義通志則以石碓
山西為陰山再西為陽山又西為大青山輯要
不專列陰山之名而於翁公山下有即陰山之
說又謂大青山在城西南二百五里府志無翁
公山而以大青山為陰山者又復終似其說則
其餘山川可知甚矣志乘之難也以川而言歸
綏道署前有左右兩水至此而合不數里流入
黑河各志俱未載詢之土人亦未知其何名此
外就輿圖所繪尚有十餘水或人土俗名或蒙
古番語考諸志乘及地理各書無可取證其輿
圖所未繪者時發時涸又當不可勝數茲編既
不敢以志乘為名僅取漢唐以來史策所載山
川名目及現在有蹟可指有名可徵并各志所
所存有名而未能核實者按其紀載先後識之

至桑柳經注尤未獲一一證明僅鈔錄原文數
則附焉維古今稱謂雅俗不同陵谷更遷分合
互異其中重複錯漏知所不免第以數千百年
經始之書值文獻不足之地一人耳目聞見難
周半載光陰蒐羅莫及並以職司書記案牘勞
形偶一游覽亦朝出莫歸足跡不數十里即或
專心採方謂芻蕘可詢而格磔侏儻語言奚辨
稍有可解亦皆市井貿易佃種樵牧暫時寄居
者流因形命名差無故實道聽塗說以訛傳訛
入耳者未敢信於心寓目者不敢宣諸口下筆
時再四審酌取舍無從埋沒又復不少至其藩
蔽之益灌溉之利一時更未暇計及閱者諒之